

# FRIISK TISING

Lasmootebles foon e Friisk Foriining – 1/2015

telefoon: 04671-6024154, iimail: info@friiske.de

## Iirsberucht 2014/2015 (korted)

. . . forläid aw e lasmootefersoomling foon e Foriining, di 19. märts 2015 önj Risem.

- E Friisk Foriining häi e 10. moi mör as hunert diiljnaamere foon e FUEV-kongräs tu besäk önj Nordfraslönj. Bai e följke-mårket önjt „Hotel des Nordens“ jäif et en infostånd ma hu spetsalitäate foon e weestküst. E törsdi häi e formoon foon e Foriining geläagenhäid än ferteel wat ouer üüs följ, unermaßd ma en ra bile.
- Üusen ålereklub häi di 22. moi tu en latjen ütfluch önj e Wiringhiird lååsid. Eefter en besäk önjt Werner-Weckwerth-Museum önj e Lübkekuuch jäif et awäädrie kafe än kååge önj e krouf foon Annelie Rasch önj Naischöspel.
- Frisia Historica heet dan ouert waagiinje foon e 20. bit 22. juuni ål tut fiird tooch en „madelålerlik driwen“ bai e bååsewåile önj Naibel döörfjard. Aw e mårket wörd üülj hoonwårk präsentird än et jäif ainmåågede produkte tu kuupen. Bait madelåler-driwen heet e Friisk Foriining dan uk sin traditsjo-nål gibselturniir oufhülen.
- Foon e 25. bit 27. juuni wjarn Christiane Bodenhagen, Manfred Nissen än Gary Funck ma da fraschsoulere üt Bräist aw en frasch fiiljtuer eefter Fäär.
- For åål da, wat et jarst nordfriisk musical „Di Widergunger“ önj e april önj e Naiblinger stäähal ferpååsed häin unti et stuk nuch iinjens siinj måån, wörd e 11. juuli önj Ecks kiino en film ouert musical wised.
- Di frasche jöogedferiin Rökefloose wörd fergången iir 30 iir üülj. Jü jubiläumsparty wörd tuhuupe ma en samerfåst di 12. juuli trinam Risem Schölj fiird, ma spale än aktsjoone for bjarne än kafe, kååge än intresante baispale üt et Rökefloose-feriinslaawen.
- Loondåismoon Lars Harms heet e 14. juuli en ütstaling ouer manerhäide önj Slaswik-Holstiinj önjt „Dorfhotel Sylt“ önj Raantem äämmååged. Sydslesvigsk Forening for e dånsh manerhäid, e Söl’ring Foriining än e Friisk Foriining häin bit tu e 12. august tuhuupe ma Antenne Sylt en ütstaling süwålj for bååsegeeste än insulaaner aw e biine stald.



Jü leest lasmootefersoomling bai „Elfrieden“

- E Friisk Foriining wus foon e 22. bit 30. juuli ma Alastair Walker än Jörgen Jensen Hahn as liidjing aw en frasch språkeråis än beseecht e saamisch manerhäid önjt Norden foon Finlönj. E diiljnaamertål wus foon began aw 25 fååstlaid, än da plåtse wjarn gau ütböked. Et wörd en trinam loked forheewen ma maning naie informatsjoone ouert saamisch följkslaawen.
- E 9. septämber köön we üusen lungiirie formoon foon e Foriining, schöljliider foon Risem Schölj, lasmoot foon e Frasche Rådj än komunaalpolitiker, Jörgen Jensen Hahn, tut bundesfertiinjstrüks gruteliire.
- Önj tuhuupehång mat jarst kultur-21-festival foon e 25. - 28. septämber önjt NCC önj Hüsem häi e Foriining döör san kulturkonsulånt Gary Funck en mörkultural teoterprojåkt aw e spalteele broocht. Da friiske ferine wjarn twäär deege ma en infostånd fertrin.
- Tut 27. Friisk Harfsthuuchschölj wjarn we foon e 2. bit 5. oktober awt dånsh huuchschölj önj Jarplund. We häin dåttooch 41 fååste diiljnaamere, deermade uk wi hu naie, plus deegesbesäk. Di leeste een köm üusen lasmoot än waane Kalle Johannsen ma sin gitar tu besäk.
- E 16. oktober wjarn üüs ålere lasmoot aw harfstütfluch. E tuur gångt tut Café Nissenshorn än tu en rouselooden önj Boorlem.
- Foon e 20. bit 22. nowämber köö e Friisk Foriining fort füft tooch et „European Minority Film Festival“ önj Hüsem üttruchte. Et wörden spalfime aw waliisch, aromuunisch, baskisch, sorbisch än gåalisch wised. Di saneene slüütj et festival ma en grut filmgala önj Husumhus ouf.